

郭襄靖公遺集

郭襄靖公遺集卷之十九

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

序文碑記

贈新溪李大夫擢興化貳守序

天王丁巳余以地官尚書屬來知南寧旣至之數日

屬之州若邑各以遠近循相見禮余見李大夫閭閻然井井然風裁意氣類非儕俗態及聞上思之治視他屬獨簡若無足盡大夫者居無何州之民相率以遷隆侵地告余太息曰民失業久矣事孰有鉅於是乎峻厥防伸厥憤微大夫誰與共是邦者大夫廼毅然振肅兵民申明疆域無利奪無勢怵無讒阻卒令悍酋欵服無敢躍馬東侵數十村遺黎晏然復故土而耕大夫功在上思詎齷齪錢穀刑名細務間哉其他興人才新文廟易筭服釋

寃滯善政不可枚舉余以是知上思非大夫不可也戊午夏驛者馳曰大夫擢矣余聞弗色喜大夫吾所與共上思者大夫去如思民何俄又曰大夫擢興化矣余輟然作而聽喜不自戢夫上思吾赤子也興化吾父母之邦也大夫去上思余得以大夫之治治之以大夫之教教之父母之邦微大夫誰與守余烏用以不喜興爲郡故所轄僅二邑賦役頗供干戈久靖政簡民馴觀風者擇焉顧今非異者比矣倭夷煽虐蹂我桑梓焚我室廬殘艾我

黎庶所在騷蕩囂然喪其樂心主者縮手策無出
至旁午檄粵西士卒萬里應援則吾興幾無民大
夫至郡出所治上思者治內出所禦遷隆者治外
何難倭夷哉余烏用以不喜余因之竊有請焉調
兵無奇策以練土兵爲策岸戰無成功以阨海口
爲功今之岐頭石門其兵足練今之南日三江其
險足防顧當事者加意何如耳舍此弗事棘棘於
郭門之塞委百里老穉而捐之甚焉者火民居燬
民積而曰以防屯聚噫計亦左矣大夫不迂余言

將必深其慮預其防民其庶幾有賴乎大夫負經
世才動有成績微獨試之上思筮仕長寧苗爲邑
劇患大夫樹堡繕兵苗用懾息至可驅以禦寇則
於吾郡乎何有余以是知今興化非大夫不可也
廼若敷教覃惠剔蠹振頽固大夫所嘗試輒效也
者余焉所効愛助大夫行矣郡同服暨邑尹文學
諸君僉謂余不容無言廼書之以爲行贈

送海觀董翁序

余同年董幼海君以太常博士遷尚書刑部郎爲

名司灋坐直諫謫戍粵之邕勁節英聲薄海內外
靡不想望風裁出淮越道湖湘凡幾閱月暨於荒
服無問識不識且爲君弗堪君顧夷然視冲然處
也已廼謝絕塵囂極意探討暇與二三子講釋疑
義執經之士充如飲河炎蒸蛇豕之封若將安焉
無幾微憤悒色君子曰履之貞者不以地易養之
粹者不以勢遷君之處此固矣雲岵之思寧無感
乎移孝作忠君之受教嚴君要有自來者明年尊
甫海觀翁果自吳來視君迎翁於橫水之磯

雲蒸泉湧石噪翁徐徐問朝夕而已比至謁者相
踵詢所歷甚悉翁殊不以脩險爲意接所論議一
出綱常大誼絕世俗沾戀之私翁爲教之素蓋益
信云翁吳中望士也蚤富才華淹貫墳典有司較
藝率冠其邑諸生乃數阨不第以貢次上春官尋
嘆曰嘻仕貴行所志爾志之弗行如仕何兒子能
乘時自奮靖獻

王家則吾志也輒辭不出不二年幼海第進士又二
年幼海以抗疏顯名天下人士知有令子則知有

嚴君翁之成子之志寧第自成厥志也者志行節
植睽非踈養遜非違懼是之顯揚孝之選也孰與
夫夫者尺寸表樹之謂何徒然日侍茵鼎奉鞠脰
左右之稱能子乎余是知翁之所安固幼海君之
所安也翁居邕甫三月翩然且歸幼海君長跼晉
數四余不佞且申申致遊子情翁爲稍止無何竟
去謂幼海君曰子毋吾念守子之貞終吾之志持
是報

國即晨昏不啻矣良御不以不獲禽而廢馳驅歷千

百歲傲霜雪弗變者材木也子其勗諸母吾念爲也幼海君重違翁命廼束裝卜日戒僕夫送翁歸余小子不能爲辭敢序翁之心以爲翁別

贈左州太守明泉蘇君赴荊州二守序

粵窮五嶺而南爲麗江其東下百里是爲左陽宋元朝世以酋長官其地

皇明馭寓易以文吏浸浸中華聲教矣顧疆境險曠民性多悍間梗于理者率頑獷不可馴甚焉導亂階釁吏于土者往往坐隳名譽去茲大夫翹然以

上考善擢大夫廣南名士也余自入粵與閣山陳君善習大夫操行甚悉陳君與大夫同舉于鄉余知言之非誣也乃明年偕小樸章君以述職行章君第吏治惟大夫最惠蹟歷歷可紀其較著者寬征興學釋久繫之寃復久侵之界云歲庚申吾鄉謙夫鄭子來幕是州詣余請曰幕之職視守重輕是小子懼余謂之曰子未知大夫乎寬而亮謙而有容子第往其圖同心之益居三月鄭子復詣余謝曰知大夫者先生也大夫與人之厚類此大夫

守左州凡七載臺使者至輒嘖嘖有異獎前後檄
凡六下其尤嘉異者爲閩南陳公方獎檄至郡荆
州之命適與期會州人士相率賀曰使者慎旌別
不蔽賢也如此

清時廣掄拔不遐遺也如此吾大夫不負清時不負
使者知也如此不休哉因僉謀諸鄭子謂余知大
夫者屬余以言贈余惟贈者增也古贈言之義取
之以增已也以大夫之才諳卓犖猶之太阿韞藏
其在左陽出匣而試芒鏑之一二從此恢恢餘地

且大試其奇於荊州其善荊州也何疑余何能有
所愛助以增益大夫守荊州者余同年太室徐君
也徐君負宏濟之才勁直之氣不與俗浮湛由祠
部郎出守海內士咸推轂下之大夫以寬亮謙和
之德協恭弘化其並軼龔黃之理又何疑也余何
能有所愛助鄭子走使伏而言曰是正所以贈大
夫也願毋諉遂次第其事若此

贈大銀臺次川譚公赴留都序

歲在丙寅秋八月

詔起公爲河南左叅政郡大夫而下相率踵門賀公
謝曰余跼伏田野久矣余性方且質不能循時好
余明於自知久矣昔在廣之西民風士習與吾廣
近余且知難而退矣今中州人士甲海內其公賦
視廣百一叅政職旬宣余度不能事事祇滋累耳
余實懼焉其何敢往鄙人自羊城走幣爲公賀公
固讓弗受其報書曰余不能趨

君命敢辱先生賜公之心可知矣居二月

詔晉公南京通政司左通政郡大夫而下復相率踵

門賀公又謝曰余跼伏田野久矣余性方且質不能循時好余明於自知久矣叅政河南所事一省事也余且知難不敢進矣留都重地公卿大夫賢且才者肩相摩踵相接也通政職納言爲

王喉舌余度不能事事祇滋累耳余重有懼焉其何敢往頃之鄙人以事至郡即造公以幣賀公又讓至再其致詞與報書無異鄙人乃作而言曰嘻嘻君子之難進易退如此哉然吾聞之韓退之曰山林者士之所獨善自養而不憂天下者之所能安

也如有憂天下之心則不能玄纁蒲輪百年曠典
廼今

明天子在上宰臣以道事君薦賢爲國若將不暇哺
與沐者起公五嶺外不閱月三錫

綸音此豈左右先容者儔匹哉公憂天下之心旣拳
拳矣是安容以不往吾又聞之毛玠典選孤寒之
士奮而倖進者擯無所容楊綰秉政同列爲之減
駟從徹聲樂此無他玠以公心取士綰以清德服
人也公惟性方故往於權勢之門不少躡足直節

勁氣灼灼當時公惟性質故於世汨然無所嗜遺
置聲利如敝屣然以公典選今日之毛公也以公
秉政今日之楊公也將使卑汚浮靡之風翕然丕
變官無裨政士無頽習百度貞庶績凝以追淳古
之風今天下士大夫無問識不識莫不推轂下公
正惟公之性方且質不循時好足以風天下臻至
理故也公茲行也世道係之矣又安容以不往公
幡然起拜曰微先生言余幾於固矣然余何足以
居之遂戒僕夫以春日載行鄙人別而去因次所

請於公者爲之贈

賀封君近竹唐翁暨王孺人齊壽承恩序

語曰一年樹穀十年樹木百歲樹德有味乎其言之也夫天之道若質劑然視履冥冥錫類昭昭終始裒益符應不爽故巖穴之士砥德礪行甘守蓬蒿而不悔乃其遺庥往往敷賁厥后人故曰天籍有紀匪終則始乃今於唐翁徵之矣翁世居吳越因占籍武衛遂爲常德人平居恂恂淵懿樸雅性喜吟咏每感時觸事操翰成篇陶然自適不以利

祿滑其中盖古孝弟力田者流厥配王孺人又以
儉勤孝敬翊而相之比德儷操雅稱齊眉居嘗語
伯子侍御公曰吾家世以武功顯今

主德明聖文治郅隆爾其崢嶸建豎以爲吾老人光
寵曩吾樹槐于庭今且蔽芾交加矣天之道豈情
哉侍御奉教惟謹立朝謇諤巍然負當世之望茲
按粵西肅紀貞憲綱舉目張所至鋤奸剔蠹問民
疾苦而燠咻之不毛舉摯擊以爲威旣登進諸文
武士又綜核羣吏以詔太宰而廢置焉粵西人總

之乃所利賴于余者尤多先是府江諸夷弗靖念
奉命致討既復有懷遠之役余方鰓鰓然懼無以
稱明詔乃侍御分猷共濟凡所籌畫振勵靡不曲
中機宜諸將士賈勇受成余亦幸得以寡咎此其
底定疆場宣暢國威又非尠淺矣夫墉崇有基河
廣有源攷德論世何莫非翁之貽哉曩侍御爲冬
官郎已拜貤封之命今歲翁暨孺人年皆八十有
五會

今上覃恩侍御復䟽請改從今封蓋異數云余造侍

御賀因執爵而言曰始余讀武陵桃源記以爲直
寓言耳乃今觀之其信然乎彼當嬴秦之世區寓
驛騷即有桑麻樵漁之樂亦潛踪遠避之弗暇然
猶得以高視塵寰跨漢越晉使漁人問津舉世驚
詫欲從而不可得乃今翁與孺人以逾八望九之
年際五朝熙皞之盛山中化日俯仰恬愉較諸桃
源不啻過之余聞翁猶强健善飯日挾騶奴携斗
酒與其弟司訓君遨遊于山陬水澨司訓君年亦
八十蒼顏鶴髮輝映鴈行里中人望之若神仙豈

武陵奇蹤復覲于今抑抱一葆貞固自有道而不
在於吐色五倉鴻寶秘笈之術與天之所眷必在
明德黃流玉璫豈其倖承侍御公勛名日起仲季
皆績學有聞且將引令名于不替而益錫以難老
之休其爲榮壽又烏可量哉又烏可量哉世有續
桃源記者尚亦有採於余言乎

賀大中丞惺菴龐公晉掌內臺序

夫爲

天子執大法貞度肅僚則惟御史臺哉今制左右副

都御史蓋漢御史中丞之舊凡六曹皆有專職惟
都御史靡所不總故列聖恒重其選云邇星變

主上祇懼憂勞慎簡諸大臣于時臺虛左副則召福
建撫臣僉都御史南海龐公入焉蓋殊擢也莆諸
大夫儼然造鄙人請贈言鄙人曰諸公指曷若哉
願先聞之則咸嘖嘖謂龐公撫我甫及期耳我方
藉有寧宇廼弗獲久借其能無憾或又慮龐公政
典方布其法在損上益下宜于赤子而不宜于乳
保今行之未習而龐公北上將無解而爲寬縱者

乎鄙人曰唯唯否否斯二端蓋閩之通指亦孰知
聖天子惠念元元雅欲公龐公於天下者乎夫憾私
圖也慮過計也且諸公不見夫水乎漚則澤升則
雨澤之惠專而狹雨之功速而宏龐公雨天下將
七閩不在中耶夫法有未善即一人之政朝夕殊
焉惡得而勿更乃龐公之法何如哉余見曩者賦
繁役苛以一民之身數畝之產而所委輸于官者
自租庸調之外無名錯出紛若蝟毛吏從而陰操
其柄漁獵爲奸莫可究詰自公之一之也民不見

吏而吏亦不得欺其民蓋萬民之利焉憲紀稍縱
州縣諸亞旅率侵官受訟追呼敲朴以自膏潤乃
衛將亦受牒而逮其尺籍之子弟橫索之金自公
之禁之也而民若軍威晏然于閭里間矣季俗侈
靡豈直民奢即公府諸冗費歲不下若干金如民
力何自公之約之也風移俗易而在位者亦蒸蒸
然有素絲羔羊之化矣閭土瘠甚賈若商類非有
鉅貲持數金以往來市廛即赫然稱雄乃有額外
諸稅吏一僧十攘臂交爭自公之蠲之也而商旅

騰驪百貨流通矣夫海之波而兵之弗戢也孰不
由於民困而法弛乎乃龐公經文緯武諸所條畫
城守事宜及海上防禦諸長策皆鑿鑿然根本之
圖斯其爲保障也大矣法寧有善於此者乎則又
何更焉且以已事徵之嘉靖末龐公爲御史按兩
浙首平賦法至今中原吳楚人咸式之非直不變
已也

主上以閩中凋瘵未甦特起公于家持節而來今化
洽人和則又召公入佐內臺行且以台衡畀之也

夫子有言如有用我者朞月而可公之按浙撫閩
類以一朞成萬世法而民戴之若此則今當軸處
中持之悠久又何如哉鄙人之於龐公瞠乎後矣
然夙有意氣之好焉蓋公剛大溫惠望之如山即
之如玉其治不專搏擊而豪者墨者望風內縮則
所以先之者豫也古稱大人者正己而物正公非
其人乎於是諸大夫咸曰然鄙人遂論次其語爲
龐公北上贈且以慰閩人之思云

壽郡侯思山陸公序

吾郡侯思山陸公之初度也爲九月二十三日時
督學使心堂趙公方檄俊造補學官弟子員皆陸
公所慎簡而升之學憲者諸弟子方戴公德圖所
以嗣頌于泮水乃嘉誕又適相值也則因豚子良
翰以請言于不佞公德澤汪濊即諸生未有請且
將祝焉况重以譽髦之踵門而豚子翰又辱公首
舉哉曩予述公政語具賀獎序中茲弗序序教因
諸生也惟壽考係作人厥旨微矣及觀水魯侯戾
止小大從邁而其下有閔宮之祝曰俾爾熾曰俾

爾昌曰俾爾耆而艾則諒哉棫樸之言乎夫作之
爲言何鼓之舞之翼之進之靡格之守靡故之徇
于以奮士志風國人化莫神乎爾也莆文物稱天
下賢科常半閩額今使者奉詔格命鄉論秀大郡
董二十人縣殺有差是庠籍且讓薦書矣士何由
興又民間俊一試輒數千人易譁難察弊是用滋
材是用混風是用靡盖恬然視爲故常矣公且試
士則喟然嘆曰小子有造守之職也予有以處此
矣夫士之譁以淆豈盡士過盖無以渙之也易曰

渙其羣元吉於是序其名五十爲一簡俾隨簡而
進得人識而徐稽之截然不淆真才畢見矣士之
感公一也即不入選亦欣然自安况選者乎福唐
即省會且用格進乃陸公力白于督學其辭剴切
若父兄之爲其子弟請也且云蒲諸庠故三千許
人太半耗于兵疫復束之格黷序且漸虛矣且此
逢蠱起諸俊類多兵後之所生聚而教誨者譬之斧
餘之萌育之則鬱然林栽之則羣然息此又當郡
人材消長之機與他郡異惟公圖之於是督學使

心堂公大感其言特加錄焉士之感公二也即不入選且欣然需後會況選者乎此謂鼓而舞翼而進此謂作人之神化矣匪祝曷感匪感曷祝况公文足式也道足範也政足庇也蓋浩乎鉅海而鬱乎崇藪明珠所出琬卉所產士觀之難爲水挹之難爲睹矣時進諸生迪之正大之操彪炳之施磊落崢嶸之節士即初筮咸勃然大人志他時所就將直文焉已乎或以陸公方文翁常觀察以予觀之文翁一循吏耳其文采無所見觀察以故相鎮

閩中柄文造士獨運其權勢固易矣陸公之視二
公將盡同乎作人而壽蓋未有涯也已

賀少司馬小江吳公晉司寇還朝序

今都御史奉

上命填撫畿內外即古天子使其大夫爲監監於方
伯之國之意其以都御史撫粵西則自

穆廟授新安殷公節鉞征古田始嗣而奉簡書開府
桂林者凡五而不佞與連江吳公咸再至云夫皇
華咨諏北山鞅掌詩人且區析之禁闥之親淮南

之重長孺猶未免軒輊焉况邊徼耶吳公謂否人
臣徼國家恩寵居常願效咫尺恨不空幕北臣日
南乃今得齒行間豈俟駕往乎斯其意與不佞實
相類自古疆場之役謀始弗慎孰守厥程慮卒弗
周孰張厥伐故後先貴於相承金蘭託於同契然
後可以樹不朽而固前盟也往不佞爲晉陵牧時
嘗奮朝食之愠以爲固當提三尺汛掃之直筴事
者有協不協耳越十年而有古田之師幸得備諮
議佐緩急粵西之知有戎威自王文成以來所創

見也又踰年得奉璽書專征伐席古田之餘威以
臨之古田餘黨平懷遠平三崗兩岸平洛容柳城
陽朔永福則又平大都伏廟堂之寵靈將士之戮
力以從事於邊鄙即攄夙昔之憤竭日夜之劬何
能建殊特塞明詔萬一會吳公以京兆代不佞疆
事皆府江就劬矣而白冒未撲十寨就撫矣而止
三未創吳公至儻有繫於疆弩之末乎其不以不
佞爲驚明矣吳公負文武材其入粵中與博士弟
子談說先王宣明禮樂未嘗一及軍旅乃其經綸

步伐固已褫羣蠻而奪其魄一事事授部將方畧
率出奇制勝一舉而福莊縛再舉而白眉五指潰
又舉而河池啼咳破又再舉而止三諸峒皆俱殲
始如處女後如脫兔未發如鷙鳥之匿也已發如
迅雷之震非有厚集之陣曠持之勢以豫讐而坐
縻之也乃所上首功小者千餘大者五千餘南丹
歸我侵疆府江登我版籍解辯投戈負耒就晦以
數十萬指計抑何煌煌乎其烈也不佞行則藉善
後之功復至則藉已試之緒所利賴吳公甚鉅微

獨薇杜之績大有功德粵人已哉吳公代不閱月
上念久勞邊事又咨惟邊境寧會少司寇缺則特簡
吳公徃兵與刑皆治世所不去而亦所難言輕用
之則爲淫爲黷重用之則爲貞爲祥吳公試於兵
已效矣以之宅嘉師之任質成明弼卽淑問之臯
陶敬猷之蘇公能專美千古乎

上方崇尚禮讓屏棄操切追國初淳懿之盛虞周到
隆今且再覩謂非公無疆之休宗社無疆之福哉
吳公行矣粵西之席未溫宣室之召遽至茲夢傳

卜尹時也入贊密勿內綜樞衡海內日跂足望之不佞尚搦管以賀

賀卓樵壺先生榮授儒官序

樵壺卓先生予母太淑人弟也幼負奇氣弱冠試有司督學異之拔置高等由是名顯諸生間宗黨之人嘖嘖歆艷謂異日振卓之先聲者必先生也太淑人念之殊篤羣子姓於塾延先生誨之聘得朝夕者凡七年寒窓燈火期相劇切以底于成先生文日益有名聘謫劣安望十一載廼歲丙午聘

濫與計偕又踰三年成進士本之皆先生教也而
先生屢試場屋竟阨弗第聘不敏勉承矩矱累秩
至今官噫嗟蹇驚入于天閑奇驥伏于槽櫪是可
以言數矣壬申春先生視太淑人於桂邨道離合
忻戚之感刺刺忘寐至論顯晦事第搔首嘆曰吾
已矣吾家若會魁公之聯第諸公之雋捷皆甫壯
年而成宦名吾爲學官弟子幾四十載矣尚復疲
黃卷曳青衿逐逐風簷角雕蟲之技哉會有詔士
之負行義而恬於榮進者例得輸粟拜儒官秩先

生以語聘曰吾已矣子誠吾念其爲吾成之吾非此之榮也藉以脫樊條吾事畢矣聘低回久之援先生至再先生意愈堅其爲辭愈切聘乃如例輸之所司馳牘郡博士郡大夫暨督學遂得請先生卜日告于先以冠服主祀事宗黨之人復交相謂曰士無論顯晦士而貞志植行即足以稱于世而先人先生之謂也皆相率造先生賀聘聞之亦色喜奚容以無言夫士各有志自昔記之矣志誠適則陋巷蔬食其樂不改不適所志即繫籍金閨

書勛竹帛猶然未自得也今之士風視古昔遠矣
姸媚泆忍靡然日流蘅蘭化爲蕭艾盖比比見之
先生亮直剛方絕無脂膏矯飾之行事有所不可
則咈然見于容盖其性然也假令出而應世服官
將伉節自靖不少委折則或爲危機所伏若環轉
脂隨爲取容地又非素性之所安欲適所志得乎
茲而釋儒之負而不失儒之稱有官之名而又無
官之責焉往而不適哉故先生不自榮而宗黨之
人交榮之况先生有子方弱冠又以能文稱固所

謂冲霄之羽也天風一順何患不九萬扶搖乎先生宋尚書樂山公後以忠義科甲名家父鈍靜公篤行君子也用儒終其身至先生儒術益著竟不遇今有子如此其顯世亢宗固於天道卜之矣謹書爲先生賀

威茂邊防紀實序

聞之昔人自古未有無夷狄之中國顧所防禦何如耳威茂古氏羗地歷代以來叛服靡一其爲蜀患久矣

皇明馭宇諸夷賓服文猷武烈輝映後先迄于今幾
二百年疆場號曰寧謐但自古灌以達松州烏道
千里碉寨星列其慕義趨化者曰羗番曰土舍曰
長官安撫諸司而阻險恣兇梗于化理者寔繁有
類亦或有款而復違有頑而乍順有外從而中悖
弱附而強窺者總之非族異心防之不可以已也
欲慎其防而不知所以防則何異於昧子索途貿
貿焉惟指者之上下耳噫其不僨邊鄙事者幾希
威茂合松潘安綿有三邊志茂有州志志邊者詳

于功而畧于警志州者侈山川名物而忽夷情夫
不明其情何以知備不聞其警何以示懲余懼夫
防之疎而患伏於不可測也廼疲精神歷山谷凡
可爲防計者靡不朝夕詢度已復稽之羣志搜之
殘牒質之輿論而揚確之耆彥以折其衷次而輯
之綴以臆見之愚作邊防紀實曰紀實不嫌避不
以私隱不以愛詳不以微畧是故郡邑之沿革必
紀武衛之建置必紀關堡之脩廢必紀土酋之忠
逆必紀寨族之善惡必紀徑隘之夷險必紀橋棧

之圯飭必紀卒伍之精耗必紀餉饋之盈縮必紀
撫剿之得失備禦之功過必紀知無弗紀紀無弗
實使按圖考跡酌古揆今由之而鑒戒以昭彰瘡
以明利害以審綜覈以周頽敝以興舉措以辨脩
內攘外之畧胥此而在不越樽俎可以坐制四夷
矣防之道不庶幾乎譬之治川非隄以障之靡不
潰矣譬之御馬非勒以閑之靡不逸矣防之爲云
川之有隄馬之有勒也其可已乎其可已乎因錄
之以時檢閱且將以告同事茲邊者

續莆陽文獻序

莆文獻故無錄山齋鄭先生始創爲之上下千餘
年間德業文章炳炳垂世嘉靖紀元以後缺而弗
錄又四紀矣希齋柯先生始復纂而續之搜校於
凋殘淪落之餘章往訓來功在人文不甚宏鉅哉
盖先生自釋褐謁告晦養幾五十年講明性術闡
發道腴固以備往哲之懿則所品藻稱述可傳而
信章章矣顧先生之自爲敘也猶有不能網羅漏
逸發揮幽潛之嘆焉噫是可以知先生之心矣夫

玉之所爲貴者具仁義禮知之德也而瑕不掩瑜
君子亦比德於玉故其爲用也玄黃蒼赤均足以
薦宗廟禮神祇或爲圭璋爲環珮要皆鎮國之瑞
象德之珍而微瑕不棄矣何者粹質之難完而適
用之爲寶也嘗閱往誌偏方下邑凡射策之英操
觚之士一以勲名著者類得紀之傳乘托名雋哲
之林誠以備一邑之觀廣來學之範也吾莆文物
肇自隋唐至有宋爲盛

明興乘勝國之後仁賢尚隱歷聖培植譽髦久之彙

奮于

世宗朝樹烈揚休則尤彬彬而特盛者也茲錄也得
在列傳者二十四人已爾其或負才瑰瑋不列於
傳者有之毋亦具溫潤縝密之質而棄于瑕者乎
將有隱於璞而未及獻與昔魯有璠璣之寶孔子
見之曰美哉璠璣遠而望之煥若也近而視之瑟
若也夫璠璣誠美非孔子望之視之幾失其實矣
士之蹈常履坦韜光匿妍靡有硤硤之行皦皦之
聲與未雕之璞則何異哉茲先生所爲漏逸幽潛

之嘆也論世君子審瑕瑜之義詳遠近之觀則甫
之往哲壯圖竑議所以適用當時者尚有溢於茲
錄之外者矣聘生也晚仰止前烈弗克有所闡揚
惟獨切掩瑜之憂致抱璞之感爾敢以是足先生
之意云

少宗伯董幼海居邕集序

世宗皇帝時雲間幼海董公以郎署上書觸迂柄相
幾陷叵測賴

先帝明聖謫戍邕管余時承乏郡中又以夙昔附驥

誼得朝夕過從間有篇章往返余旣櫝而藏之矣
已別去數載爲隆慶丁卯

穆皇嗣服公乃環召又數載晉少宗伯中外風塵逝
焉久之比得公全集締觀不啻拱璧撫粵稍暇漫
加詮次摘在邕所著者彙爲十卷與此邦人士共
焉工旣殺青余復從而敘曰渢渢哉詩之爲教乎
昔宣尼之論詩也謂可興可觀可羣可怨至於事
父事君尤三致意云後之談藝者舍是奚則焉三
百篇而下惟杜少陵超軼諸家匪徒以博極羣書

眩具衆體已也彼其忠君愛國之心裒徊顧戀雖
間關隴蜀至拾橡栗以自存曾不少渝焉今北征
諸篇可按而頌也彼鮑謝沈宋之徒排比聲律流
連綺靡何可勝道哉廼觀公集中雅鬯淵醇無幾
微憤懣怨懟意每感時觸景即眷念

君親有子牟魏闕太行白雲之想至於緣情體物贈
送酬答則皆質而不浮興而有要駸駸脫去畦徑
直超上乘矣蓋其仰止杜陵千古一心故意匠所
孚動自合轍可興可觀可羣可怨之旨蓋庶幾於

不詭於聖人者昔蘇長公以文章氣節雄睨一世
及謫居惠陽深思引咎靡所怨尤惟以雲山詩酒
爲樂後人名其集曰寓惠余亦竊附斯義偕名公
爲居邕集然公遭遇

清時游歷卿貳名位方光光然大較諸文忠再遷
海終老于行又孰爲多哉邕之山川草木藉公琦
詞傑構以傳公也退食從容慨念疇曩能無意於
邕之人乎公嗜學不倦孜孜好脩其所著又有述
史景獻及諸序記別有梓行茲不具論第論其居

邕者若此云

大司寇蟠峰李公督撫疏草序

督撫疏草者刻大司寇蟠峰李公制粵時奏議也
公行矣自曲江辱委序余得卒讀焉自陳謝外大
都國計邊防民情吏治及表章勸勵之典洋洋乎經
世維風之言非徒文也至鉅畧忠猷若討復古田
諸疏真忠勤惓若乞歸侍養諸疏則未嘗不撫卷
欷歔嘆曰大臣體國慕親若是乎兼至也

聖天子任賢之哲體臣之仁亦足仰窺萬一是廣

西寇患侵軼古田縣治久淪於夷

上惻然念亟圖所安攘策廼肇設撫臣俾專征伐已
復以蒼梧制府二廣兵餉所需計非得忠誠博大
之臣共圖之將掣頰誰與成功

詔下銓司其慎擇往廷議僉謂非公不可無何命果
下盖自留樞出總兵柄誠重之也公聞命以庚午
五月踰嶺而梧威稜遐屬庶幾邊鄙不聳矣于時
余偕諸大夫暨督帥而下以次詣制府請謁公從
容諮畫首惓惓復侵疆清大憝紆

九重南顧憂於凡命將之畧興師之備料敵制勝之
機靡不曲中窺要而虛懷曠度周詢猶若弗及所
謂開誠布公賢愚僉亡其身者惟公有焉會是歲
諸司例當入覲余時以藩臣長具牘告行公不許
且草疏以戎事留余復前請曰脩覲臣職也況有
母在將迎以歸公愴然曰君言及此是益吾愧吾
母長若母且幾年矣吾欲歸侍之日久矣簡命方
新渠兇未殄義未敢言去耳言已愀若不可禁噫
公之心可知矣時冬十月大兵正集諸將如公令

進討古田征戈所揮望風披靡俘斬凡萬餘人其
諸蟻伏懸崖號呼乞活者不可勝算即爲書報前
撫臣曰百年疆宇賴

宗社之靈將士之力一旦唾手收復藉以紓

宵旰之勤矣何事窮征即日罷諸路兵獻捷狀

上聞大說賜鍰幣甚厚晉公右都御史兼兵侍總督
如故復具善後諸議以上凡所募畫鑿鑿銷萌保
泰至計八寨懷遠諸徭相繼輸款嶺東南諸道以
俘馘報無虛日而數澤嘯聚轉喙息解散殆盡兩

粵遂稱太平無事云公旣鞠躬殫慮綏靖嶺徼思
太淑人愈篤脉脉有不能奮翼之懷矣前後乞歸
連四疏其最後曰母年益高臣身益病抱病日深
思母日甚至誠懇也疏皆不報

上念公忠勤復晉大司寇而公請益力於是始得侍
養歸非公遭際

聖明制府未必用公功未必速成功成矣未必陟上
卿奉親歸故里

上不疑而衆不嫉世之人所咨嗟羨慕而不可一得

者公如取諸寄本之精誠孚格非偶然也誠難哉
難哉余方羈邊疆將母無從視公旣歸怡怡愉愉
朝夕太淑人側備孝養之懽頌

主恩祝

聖壽全節完名謂忠孝之極致臣子之兼榮非與昔
孟氏書七篇首言仁義仁不遺親義不後君是道
也公殆兼之矣百世而下讀公之䟽雖與出師陳
情諸表爭光可也余故表公之大如此他不具述

貞肅林先生文集序

蓋詩曰高山仰止景行行止不佞聘襲茲忱於先生素矣慚不佞僕邀叨塵仕籍代匱留樞竊願私淑而未逮迺先生孫及祖裒先生集而屬之敘若謂不佞知先生者不佞得卒業懔然神嚮藉手先生集執鞭先生生平幸也顧學士大夫敘先生集者業纒纒具矣先生當

憲廟朝毅然糾權璫妖僧於廷明之罪聲震雷電而搏魍魎是韓昌黎佛骨之表也國史將大書特書之然而以國事皦皦自鳴非先生志也而侈竹帛

者復豔譚先生伐先生填江右則藩濠杜請涖川
蜀則監鄆投戈是汲長孺之寢淮南趙清獻之撫
西蜀也兩國人固百世尸祝之而先生則非倖勲
伐爲聲者若術先生文則是編具在也疏牘先忠
齷而後藻飾辭章崇神理而薄俶詭是又陸敬輿
之奏議歐陽永叔之文章而集其成者操觚士類
能誦之不佞忱無敢謂知先生請明先生所以兼
茲三不朽者夫人一心耳是曰靈府一以紛華寵
利淬其中萬動窒矣先生善白沙陳先生探致虛

主靜之學雅性恬澹不以物累滑心方起家爲郎
建言逮獄時胃中已無死生何論利祿已而藩臬
辭者再填撫辭者十一卿列辭者十三最後典邦
禁僑居省閩無少牽位意其難進易退類如此是
豈紛華寵利得滓其靈府哉靜虛之學蓋湛乎其
澄淵乎其邃矣以故挺爲勁節鬯爲駿猷蔚爲文
詞一本之涵養學問中來者蓋昔諸葛武侯際主
也於漢家勲詎不焯爍而托孤之節出師之表騰
諸誦說至今揆厥所原則澹泊明志寧靜致遠寔

本之倘以先生質武侯非耶嗚呼先生之節之勲
之文昭昭垂不朽矣而睹先生之不朽亦必有明
先生之學者環寓內而遙曠以百禩聞先生風猶
然興起矧也辱生桑梓之邦者乎不揣援是敘先
生集云

西南紀事序

西南紀事者紀撫粵時事而作也粵西界在南服
山川紆鬱夷獠錯居鷗張獠突禍元元而厯

宵旰由來遠矣余自丁巳以司徒尚書郎出守朗寧

習聞其槩惻然懷焚溺憂已復由藩臬晉填撫前
後幾二紀于茲蓋最久而所以與籌畫者亦最苦
且繁而竊有感於兵興之難焉夫古田府江懷遠
問罪之師毋論已即洛永諸役皆不得已應之勛
勦數歲幸覩一時之安而西南之物力且詘矣假
令新寧不州忠州羅陽二土酋不以計取則左江
列郡釀成大釁是又異時之思田也紛紛苦兵寧
有已耶噫嗟兵易言哉不戢自焚余茲益信之矣

乙亥秋余叨

賜環懼夫此而弗紀後之事茲土者無由以知其成
之難而保之不易也迺次其畧曰西南紀事各綴
膚論於朶六都根極禍源峻防杜釁庶幾不至重
兵以疲民焉爾顧荒陋弗文置不復葺者久之茲
奉

召命復撫是疆道出蒼梧督學袁君適以使事至袁
舊左州守也稔諸酋夷狀甚悉藩叅胡君陳君先
後來會均有槩於中者偶譚及余檢諸笥中出所
紀草示之三君作而嘆曰前事不忘後事之鑒不

有茲紀烏由傳乎蒼梧陸守遂請于三君謀壽諸梓梓成余聞之湯述其意如此同志君子其諒余不獲已之心非敢曰侈示云也

郭襄靖公遺集卷之十九終

郭襄靖公遺集卷之二十

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

誌銘

明故大中大夫長蘆運使定軒彭公墓誌銘

定軒彭公既卒而葬垂四十年矣隆慶辛未令子

文質以司徒尚書屬出守桂林明年壬申二月詣
余請曰先大夫見背孤兄弟方在弱齡葬久未銘
孤竊痛焉願誌一言以詔來嗣言已愴然泣下余
亦爲動容太守余妹婿也余視公爲先輩蓋自韶
齠時服聞彭氏世德久矣安敢以不文辭問狀則
今銀臺晴川李先生作也有道之言其可信傳無
疑矣按狀彭之先自浙徙莆景炎之變散居涵口
白埕漳江諸地橫塘則漳江流派也在宋有祭酒
特魁學士孝子蔚然聲稱至我

明成化弘治間官保惠安公特起而昌大之嗣是簪
纓科第代不乏人爲莆閩閎云公諱大治字宜定
曾大父時銳大父邦彥誥封奉政大夫父甫號忍
菴廣西按察司僉事奉勅提督學校進四品服母
陳繼母許俱誥封宜人公天性孝自爲兒時每食
不離親側陳宜人卒公哀毀至輟飲食及事許宜
人尤謹稍長侍學憲公任適廣西鄉試士學憲公
以程策五道試公公援筆成之見者莫不驚嘆巡
按御史閱之批曰博洽類張華經濟似蘇軾其見

器重如此弘治辛酉以儒士薦于鄉試南宮不第
卒業太學登正德甲戌進士授南京戶部陝西司
主事歷陞本部郎中會

武皇帝南巡倖臣江彬扈從勢甚薰爍公卿而下咸
曲意奉之司徒視其屬莫可任會計事公毅然當
之百需取給靡不從容規濟而賴以節縮甚多諸
侍衛亦憚公廉威無敢有干紀者

上命王侍郎憲書

皇帝欽獎四字旌公能人爲公榮之無何擢揚州太

守楊當水陸之衝冠蓋之會俛眉承睫吏習爲常
公至郡勵志冰蘖凡所注措務在惠民耻爲世俗
媿阿態諸津要有所干謁公一切謝絕御史以行
部至公自重未嘗一屈膝下之竟坐耿介不容調
四川敘州府時僂蠻大叛諸郡騷然撫按檄公招
輯之公擇材官可任者示之意令往宣以文告諭
以逆順賊故聞公名皆驚呼羅拜解散而去民以
無擾公之功也居數月聞學憲公訃慟哭幾絕旦
日解綬奔歸百姓遮泣爭脫公履祀之比歸居喪

三年居處言動一於禮足跡不入城府羣族之子弟教之淳淳於孝弟忠信之義子弟多所成立平居不妄交遊惟與鄉人劉孝子閔雅善所著有孝經註解家禮補遺皆二公共成之若學庸直指五卷則公所自著者也起復改知韶州清操愈勵撫巡交章薦稱曰孝友懋著於八閩循良獨冠於兩廣蓋實錄也公以許宜人不就養故日以爲憂積成癆瘵累求歸養不可得病日益劇庚寅春擢長蘆運使甫聞命而公卒矣時年五十有五也終公

之身無一字一疇以貽孫子古所稱清白吏非與
噫嗟以公之行履皜皜炳著如此乃位竟止此豈
造物者有所豐故有所嗇耶彭以志節世其家忍
菴公風誼峻凝比之歲寒松栢官學憲十餘年人
以公輔望之飄然引去不爲逆瑾所援公自釋褐
時有詔選進士充臺省公才望在選中以一謁當
路爲耻卒不與此豈顯晦利鈍所可少動其中哉
希齋柯先生續莆陽文獻公父子首在列傳可以
垂不朽矣今太守砥節勵行無媿祖父風所以永

家聲宏先志者尤未艾也造物者之意將不在是乎公生於成化丙申二月初二日卒于嘉靖庚寅三月二十三日娶朱氏雷州府教諭潘女贈安人加贈淑人先公卒端莊淑慎克相于公繼娶林氏寧德縣太子太保刑部尚書璉公子治中晁女封宜人加贈淑人恭儉慈和有賢德焉側室二一宋氏贈安人一魯氏子男四文陽文興俱林出文陟魯出文質宋出文陽娶嚴州府學訓導王子桂女文興郡庠生娶庠生俞應登女文陟娶大理府經

歷林繼武女文質即太守也舉嘉靖癸卯鄉試登
已未進士授廣東潮州府揭陽知縣歷戶部主事
郎中轉今官娶余叔戶部主事清公女贈安人繼
娶顧氏封安人女四長朱出適兵部郎中徐公元
稔男庠生某次林出適禮部侍郎贈禮部尚書林
公文俊長男高州府通判宗翰三適南京國子監
錄朱某長男紹箕四許適大理寺丞李公廷梧次
男某俱宋出孫男十一憲章憲祖憲召憲范憲默
憲璧憲時憲敏憲教憲中憲安憲中余婿太守之

七子也孫女十曾孫一汝勵公墓在本里祇園之
原附忍菴公墓爲五竈公居中左朱淑人右林淑
人左之左宋安人右之右魯氏壽藏銘曰猗彭之
族昉自漳江源深流迥奕世其昌粵若惠安清朝
梁棟學憲嗣之棲桐祥鳳惟公克肖學博守約通
籍金閨益謹矩矱司徒會計

帝曰汝賢郡章載綰牧愛彌虔宅恤壺南惟孝是友
讀禮著書外此何有韶陽再徙雲岷傷神繼以泣
血不有其身嗚呼美患弗彰文獻稱始盛患弗傳

子孫接趾若公者可謂不死

明故朝列大夫南京刑部廣西司郎中石溪陳
公墓誌銘

萬曆七年福建守臣奉

上命爲故朝列大夫南京刑部郎中石溪陳公起塚
于莆城南鳳凰山麓越某月日公冢子宮諭肅菴
君奉公暨母封宜人朱樞以窆先期以憲使壺陽
鄭君狀來徵銘余嘗從石溪公偕計後稔其出處
大致安敢以不文辭公諱言字宜昌其先蓋出潁

川入莆自唐清遠令公樞始其家城左陳宅自宋
尚書公仁璧僕射公靖遜第爲郡署始明興六世
祖觀官叅政遇知

高皇帝未大用卒五世祖熊鄉進士祖南峰茲考愧
峰宣並抱潛德以高年拜爵愧峰行誼具郡志隱
逸傳中妣黃孺人前塘人公幼穎敏弱冠卽有聲
黌序顧困棘闈且二十年然識者知其必大售嘉
靖丙午舉鄉薦第八丁未舉會試第四登進士第
肄政禮部拜泰和縣知縣改湖州教授稍遷國子

博士擢儀制主事傳李都尉坐建安李太宰鄉故
左遷柳州同知量移泰州知州遷南京刑部員外
郎中謝事歸時嘉靖辛酉也

穆皇卽位詔復公官致仕

今上覃恩復進朝列大夫方公之肄政也宗伯泰和
歐陽文莊公深器之請銓司以爲其邑令泰和故
難治公至持法裕民罷一切諸煩苛政乃竟以朴
直不媚上乞閒秩去泰和人思之弗置也文莊公
亦曰陳公亡負吾邑吾邑負陳君哉柳泰政如泰

和乃桺當採木會泰患島夷羽書旁午而公精勤
拮据不以遷客自命其教湖州執師道甚謹湖士
肅然憚之官輒所至所鑒識多奇士顯聞仕路中
允陳公思育司諫韓公紹僉憲李公樂其最著者
桺人文久鬱公一陶鑄遂比比挂賢書性喜恬淡
李太宰方持衡名士輻輳其門獨嘉公不數謁
肅皇帝之爲都尉置傳也太宰卻樞近囑以公名上
事孰公於此而卒以太宰故謫桺留曹解組亦坐
泰州時不曲承當路恐遭櫪掖遂謝病去其偃蹇

不偶類如此然公歸甫三年而官諭舉鄉薦第十
連魁南宮巍科濟美翰苑蜚聲啓沃經筵眷遇特
渥此足睹天道已昔人有言不在其身在其子孫
理固然乎公性孝友自爲諸生授經四方所得脩
脯悉以贍俯仰費撫弟妹迄于成立家居葺墳廟
廣祀田修家乘皆其大者少時里中嘗有侮公者
旣貴其人以他事抵罪使者廉其侮公狀欲并坐
之公謝亡有所謂犯而不校者非與所著有石溪
藁及儷語若干卷公之疾也官諭聞之亟請歸省

上賜乘傳以行中途聞訃哭絕乃蘇復上書請卹典
上皆可之令甲京朝官三品以上得請葬祭

上以宮諭講幄功特賜公且併祭朱宜人誠異數云
朱宜人琳井人故古田尉受敷女先十年卒閩行
具司成許公國誌中公生正德丁卯卒之歲爲萬
曆丁丑享年盖七十一子二長卽宮諭經邦宜人
出娶林氏副郎應驄孫女封孺人次經學側室何
氏出聘蕭氏副郎奇勲女女五長適黃僉憲華孫
庠生必輔次適吳副郎元玉子庠生梟皆宜人出

次適余僉憲一鵬子庠生澄次許李縣尹日新子
治次許方給諫萬有子應僖皆何出孫男一翰佐
庠生孫女二長適林方伯燧章子陞次即許鄭憲
使茂之子淞也皆官諭出墓坐 向 爲竈二公
居右其左朱宜人銘曰兩都騰騫七袞歸全矧有
文也足傳盱盱抑抑蓄豐用嗇而有子兮華國鳳
麓新阡立馬盤旋曰有命自天孔安者域偕藏者
德駿發來哲永焜燿于無極

明故中順大夫程番府知府進階大中大夫林

公墓誌銘

萬曆癸未夏四月某甲子前貴州程番府知府進
階大中大夫林公卒于家享年百有四歲公子少
司徒公以狀來徵銘其墓不佞愧謏焉無能爲役
顧往宦游粵西猥辱司徒公推轂誼至厚其何敢
辭按狀大中公諱春澤字德敷別號旂峰當百歲
時有司爲樹棹楔署曰人瑞人咸稱爲人瑞翁云
始祖文蔚仕五代周爲奉節令有聲義不仕宋隱
于閩石井冠英坊晚得北嶼之勝因家焉文蔚生

寶承先志累辟不就至仕衡始仕宋爲經畧使歷
宋元迄于

明興代有聞人高祖少尹植曾祖燾祖世亨咸以耆
德重於鄉贈承德郎戶部主事養德公則公父也
母陳以成化庚子冬生公秀發異凡兒甫七歲世
父司教公以畫扇令公屬對公應聲對甚奇識者
知為亢宗器弱冠以執禮補候官弟子員督學使
者每試輒寘高等正德庚午舉于鄉以卜兆葬母
不就南宮試甲戌舉進士聞養德公喪奔歸哀毀

幾不勝服闋授戶部主事遷署員外郎司權臨清
寬征䟽滯商旅便之屬武廟南巡邊帥江彬扈從
張甚公持正不阿彬爲氣奪已監督京通昌平倉
清積貯之耗爲正儲出席板之羨爲公費與提督
宦者相持具䟽論之無所訕滿三載贈養德公如
其官母陳氏繼母楊氏皆爲安人督運北河河流
阻塞與司空郎協力䟽濬是歲漕得畢達嘉靖改
元召用耆舊戶部尚書孫公侍郎金公咸重公才
章奏悉令屬草且薦于太宰度次用之竟以楊安

人喪歸起除浙江司郎中以盜闌入司藏謫江西
寧州同知怡然就道至則葺學宮新宋周元公祠
羣諸生講業于祠內亡何量移判吉州督賦寬平
政聲籍甚暇從羅太宰譚程朱之學一時名士如
尹宗伯諸公皆出門下尋遷肇慶府同知會島寇
掠高州當事者檄公往攝篆公習知徭兵之害悉
罷遣之而代以土著部署方畧寇次第就擒城堞
樓櫓繕築堅完民賴按堵比得代還父老遞留不
可得相與勒石紀績且俎豆尸祝之以迄于今已

擢南京刑部郎中曹務簡師事高陵呂先生得聞
心性之奧時朝議邊方急賢守令遂擢公守程番
公不夷鄙其民均租稅正冠服建郡東石橋以通
病涉者改卜學宮月朔進諸生辯析經術擇耆德
文學之士分布夷寨爲童子師於是夷人始知漢
威儀駸駸嚮學乃今賓興不乏則文翁之化也卧
龍金石二司暨通州寨屢年失地督府檄公與安
宣慰李指揮協謀平復兵不血刃而反側自安功
未上會大計吏爲忌者所中公以候調歸築錦溪

草堂日從父老故人引滿賦詩蓋自是無復用世之志矣公天性孝友痛養德公母陳安人不逮祿養忌日必縞素涕泣而祭終其身以爲常撫諸弟備友于之愛婚娶皆取諸橐中里中貧者待而舉火喪者待而衾斂蒸嘗有田土穀有祠合族有譜大誼章章不可更僕數也早歲喜稱詩與鄭郎中繼之方僉事豪何舍人景明相倡和晚乃喜讀易超然默契以故神日王而筋力不衰年踰期頤杖履登涉矯健如少年端坐而逝人謂公委蛇云先

是冬有星隕於所居棲鳥皆驚屋後巨石泐焉而
公竟即世吁嗟嗟異哉公配陳氏封安人子男三
長應亮即少司徒公娶鄭氏誥封淑人適出次應
憲娶王氏應起娶胡氏俱邑諸生庶出女五孫男
九長如楚廣東提學副使次如粵如虔俱諸生如
安如泰如周如召如賓孫女六曾孫男五昌世邑
諸生昌禧昌兆昌旭昌運曾孫女二玄孫男二所
著有禮記筌蹄十四卷今讀禮者多宗之家訓十
六篇人瑞詩集十二卷蓋公生熙洽之世所漸

於風教者深即壯歲懸車德施未究而以其惇龐
博大之氣發爲文章衍爲子孫引爲壽考自有闕
以來指難再屈也儻所謂得全全昌者乎司徒公
以某年月日葬公于錦溪山之陽坐亥向巳銘曰
旂山毓秀有開必先我公崛起藻雅翩翩廻翔皇
路高臥林泉爲邦循吏爲世謫僊介爾眉壽單厚
百年宜爾子孫濟美象賢玄宮載啓丹旒言旋奕
世昌阜錦溪之阡

明故奉政大夫四川按察司僉事紫崖楊公墓

誌銘

吾鄉紫崖楊公僉憲蜀臬滿歸卒于家肯嘉靖乙卯歲春正元日也越若干年冢子諸生名奉葬園清里赤岑山之原今又若干年所矣子諸生名介而徵銘余方勛勑留樞謝不敏復哀請曰先大夫墓木拱矣有燉湮鬱懔懔未子所爲逝者不朽惟司馬一言是馮余辱僉憲肺附誼不敢辭按狀僉憲楊姓諱皆字同卿別號紫崖居莆陽城蓋自唐防禦使盈公七世孫宣義始王父諱瓚起家進士

官考功員外郎出叅河南政以廉介載郡誌王大
父察贈吏部員外以叅政恩父褒贈戶部主事則
僉憲也主事三子僉憲其季幼警悟多奇試諸生
聲籍甚失怙事母翁最愉孝悼厲未讎久之念所
以耐母者乃去而就學章司理衮于建城因及徐
存齋先生門徐先生嘗以內翰出理劍浦與語大
器之教以從其偏則文不著象其成則德益昌之
旨繇是學益本原嘉靖丁酉舉于鄉戊戌成進士
需次刑曹持母翁制歸起拜戶部主事甲辰監稅

江南夙蠹大剗旋病假調補奏最父褒得贈如其
官母翁贈安人尋遷本部員外郎戊申擢四川屯
鹽僉事適有苗夷之警三省震動撫巡交章薦于
朝且檄監兵討之僉憲率所部大殲黠黨諸苗讐
服功聞賚鎡金綵幣殊渥廼僉憲瘁戎行報滿間
假道省封厯得正寢距生正德丁卯閏正月十三
日未時享年四十有九識者深以未及大用爲憾
云僉憲雅性惇默即不務樹赫赫聲而監稅平夷
諸績要非矜燿炫飾者之爲烈而割廩贍兄嫂捐

貲撫孤姪內行固自卓卓者著有玉海衍義四書
葩經口義行世配林氏封安人相僉憲有孝儉風
合葬赤岑山子男一卽名娶陳叅議俸孫女女一
適庠生林一崗孫男五某仙邑庠生娶林重恩女
繼某氏餘尚幼余旣誌而系之銘銘曰性塞以淵
才博且碩游颺版曹蠹剗實核襄厥夷苗寵蕃帝
錫經術鈎微孝友善則年嗇留豐赤岑儷璧鬱鬱
千秋繫孫子之積

傳

正學一菴吳公傳

吳公諱紳字克服別號一菴其先出唐莆田知錄公良世居孝義里至中憲大夫臨淵公始遷城中憲公諱希由起家弘治己未進士歷官四川按察司副使公其仲子也少聰穎不羣八歲問中憲公日何能明中憲公曰天之陽精也曰人亦有陽精乎中憲公奇之弱冠授以胡敬齋居業錄曰此道學正脉也小子識之公遂奉以終身嘉靖丁酉舉于鄉屢上春官至丁未乃謁選天曹領江西德

興教諭至則築君子臺讀書其中日與諸弟子橫
經講藝示以心性之學有四書講義行于時間攝
篆安仁首葺胡敬齋先生祠又入金谿訪陸象山
故居徘徊久之官諭羅文恭公之先大夫與中憲
公有世好聞德興之教喜爲同志賦詩贈之載在
念菴集中嘗校文浙省所識拔皆名士滿五載遷
桐廬令桐廬當婺歙之間爲浙中孔道使舟往返
鱗次晨興占署未畢即樞衣造謁大者磬折次亦
浮湛謬爲恭乃公一裁以禮終未嘗飾厨傳以媚

過客異時徵賦太早民苦於穀賤率數鍾易一金
公乃寬其期禁賣人毋乘時射利以病農邑故有
鹽商截引錢歲不下五百金公悉卻之曰焉有縣
官而受賈豎金者俗素多訟公爲立鄉約時時屏
騶從詣會所教以孝弟忠信之義訟廼漸息立社
倉諭富室出穀以實之歲斂散一如文公浙東故
事境內淫祠盡撤毀至建尊經閣創安樂書院修
嚴子陵祠墓則汲汲惟恐後其崇正闢邪類此先
是倭寇浙東公矍然曰旄頭垂象東南之禍始矣

桑土之謀奚可緩乃葺演武場扁曰思豫汰在官
虐冒者以其直募丁壯得六百人朝夕訓練如法
明年甲寅倭果從富陽入公即率所部卒拒之于
境上斬其酋從數人賊退人始服公先見越明年
乙卯倭數千薄杭城北新關盡燬居民廬舍軍門
李公檄諸縣兵入援公獨首應召爲舟師陣勝果
寺外軍門深慰勞之越明年丙辰倭陷仙居公率
前兵與他部相犄角因得參謀議雖冒暑雨度巖
菁不辭捷聞優賞人言公孱然一儒生不謂其乃

知兵若此尋擢常州府通判時視師大臣藉柄相
寵齟齬諸當事者勢暴甚公喟然嘆曰是尚可以
仕乎遂投牒歸郡中吏民無有知者後督府檄郡
中強起公公竟不應此公平生建樹之大都也然
公視之以爲此土苴耳於吾身心奚益蓋公自爲
舉子時謁考亭闕里已毅然有任重之意作天游
歌以見志雖在仕宦兵旅中猶進修不輟至是則
益杜門謝客獨坐凝虛樓以講明性學爲已任初
爲會于南山僧舍人或嫺笑之公曰此君家本業

也吾特爲君經理脩復爾君何疑焉又入黃石與友人朱應春陳桂芳訪林艾軒公遺蹟爲會於紅泉東井間門人張試等從之者若干人及倭陷吾郡公避地榕城則爲榕城會門人郭復等從之者若干人又之金陵則爲冶城會都人士暨莆士流寓于彼者從之又若干人皆有語錄鋟傳乙丑還莆時倭患甫平居荆榛瓦礫中公怡然朝夕講誦如初乃闢鳳山草堂旁郡聞之來執經者又若干人督學蔡公行部檄郡中以禮幣延公與司寇林

端簡公主政柯希齋公共主四庠諸生會遜避至再而後就於是復會于鳳山寺有鳳山初言及鳳山答問旣而伯子曰強爲博羅令公就養卽中因登羅浮山與憲副李君渭廣中薦紳龐君嵩周君坦楊君起元等剖析玄微聽者悚然恨識公晚無何觸暑東歸抵家不數日卒年六十有三門人會吊者數百人私謚爲正學先生亦可謂守師說而不變者矣公平生論學甚多大要以主靜爲本其言曰古人小學約之入靜後人自少放逸非靜坐

何由見性即見性非主靜何由凝固此聖學成始
成終事不知者以爲禪誤矣又曰欲存西銘仁體
當守東銘戲言戲動之戒又曰學者須養孝弟之
心若家庭乖戾而曰我能忠君信友者吾不信也
嘗語日強曰此物無内外無人已無古今本自充
足吾將焉求哉又嘗謂義文周孔一心彖爻卦象
一理末學岐而二之猥曰四聖之易不同何耶乃
築玩易窩默識沉思叅伍衆說而一折衷於聖書
成命之曰易通蓋自謂晚年定論云公天性孝友

痛母張孺人蚤背遇祭奠必號哭盡哀事陳宜人
孝養備至伯兄舉人綾早世中憲公擇族人嗣綾
割其產半與之公無少憾著家訓增祭田修大宗
祠及先世墳墓葬族中貧者二十餘喪乃所居則
僅蔽風雨敦本厚倫人以爲難所著有一菴集及
志學錄朱子要語太極圖止至善慎獨諸說並前
諸講義語錄易通卒之明年門人相率請于郡守
江夏陸公及邑令永嘉葉公建祠于鳳凰山麓祀
之子二人長即日強能紹明家學爲博羅令有治

績今擢建昌府同知次日章邑庠生諸孫濟濟克
昌厥後矣論曰莆自林文節公與考亭上下議論
揭正學而張之鵠其流風至今不沫世儒眇論溢
發視性命若芻狗高者又盛自推引言出而悖躬
行之謂何吳公孳孳好古振起于波流之中觀其
論議淵泓質行純備盖卓然慥慥君子也語曰斯
馬取斯亶其然乎

事述

先太淑人事述

吾先母卓姓水南誥封常州府知府卓叔輿公孫
女父庠士文泮公母澄塘方氏先母幼稟聰慧能
通小學論語諸女書年十五父母相繼沒哀毀痛
哭每至幾絕叔父文溥公叔母林氏撫而嫁之及
歸先大夫凝波府君恪執婦道事祖封主事屯翁
公祖母封安人吳甚謹視前母黃所出子二應科
應徵女一如已出女當適人悉出已衣飾與之先
大夫以乙榜授靈山學諭繼任直隸太平府學教
授母皆之官先大夫師範甚肅羣諸生於學舍日

講課之寒暑不輟母日供茶數四其不能自膳者
餉之率以爲常先大夫在太平最久所成就士最
多如侍郎端公廷赦右都御史倪公嵩御史楊公
東叅政許公璫副使邢公址楊公金輩皆相繼登
甲第故頌先大夫之教者咸曰吾師母內助之功
不敢忘也時祖屯翁暨吳安人齊壽八旬先大夫
繪瞻雲圖徵諸名公詩文爲壽母手製衣袍獻之
先大夫以九載考最遷廣西太平府通判值思田
兵興抵郡未旬日制府檄督兵餉日夜委輸勤勞

百至以疽發劇乃舁歸郡署臨終執母手囑曰吾
不孝貽父母憂汝歸善事之兒雖幼異日必成吾
志汝善撫之母以吾故傷生令吾兒失所恃也時
孤方七歲母年甫三十哀毀仆地水漿不入口數
日家人泣告曰母獨不念主君之言乎母乃強起
扶櫬還鄉遇水陸艱險輒常重遲不進母携孤哭
曰我不死爲撫而孤矣輒乃輕舉而進蓋冥中欲
堅母無死意也夜間撫輒哀哭達旦不休路人聞
之莫不酸鼻抵里之日雙白淒然母曲意承事間

脫簪珥爲供具務得其歡心廼已所遺產三分均
給二伯兄及孤先叔父主事公議內抽百斛爲母
伏臘之需母輒止之而自甘於澹約未幾屯翁暨
吳安人先後棄世母哀慟不勝喪葬一從於厚家
用寢耗時勤績紕以給匱乏無怨尤心而督孤就
學益力雖在童孺束脯倍凡兒每夜歸必稽日所
頌書生熟作字楷拙做書之類多出手裁他如祝
文儀節亦口授筆記之聞與凡兒嬉遊必撻之不
少貸稍長延師供友力貧營辦務求劇切以底於

成家政無巨細悉母綜之以故孤得專志課業已
補郡弟子員領鄉薦第進士何者非母訓也孤既
拜司徒郎迎母就養京官祿入素薄母率以節約
布裙蔬食無異居家時至用敝鉢貯火以禦冬月
其儉約類此秩滿贈父承德郎戶部主事母封太
安人又二年孤出守南寧南寧於太平爲隣壤母
諭之曰爾父以死勤事名宦血食茲郡爾可不自
砥礪以無玷先聲耶躬率儉勤室無交謫至敦義
周急皇皇如弗及親族多賴以舉火者秩滿贈父

中憲大夫南寧府知府母封太恭人逾年轉四川
按察司副使備兵威茂蓋壤接吐蕃極邊之地也
孤以母故不欲行母讓之曰爲官者人擇地圖安
邊境將誰賴即促裝就道雖歷偏橋飛石之險瞿
塘滯澦之危意未嘗不爲快也又二年擢廣東叅
政會重城工興旋有二源之後撫巡皆檄孤監督
孤奔走憂勞日不暇給次增城忽得危疾母晨昏
叩首籲天賴以無恙孤得子晚兵事方殷適二子
患疹重母護持七八晝夜至少間始令孤聞之孤

得始終戎事無內顧憂隆慶登

極以次當入賀將行白於母曰兒叅政且三年矣賀
竣報政例得推恩祖父母及父母母蹙然曰我誓
志撫孤倘世被恩光異日可以見爾祖父於地下
矣顧二兄之母猶而母也尚仍民婦之稱不惟爾
兄弟之心不安我之心尤不自安爾其圖之已而
奏滿祖父俱贈中大夫廣東布政司左叅政祖母
吳贈淑人母卓封太淑人前妻余繼妻楊皆例得
封贈孤具疏上請遂得移贈前母黃爲淑人母

之喜曰是吾志也隨之任廣西按察使聞獄中鈴
析聲嘆曰人命至重得無有枉者乎知有所平反
則色喜聞鞭笞則惻然見于容蓋其性然也爲布
政時公署後地忽陷數尺母怪問曰變安從生汝
可不痛自加省孤爲詞告于城隍有一毫利已瘠
民甘受神殛母貽民殃之語母始怡然謂庶幾無
得罪於神人矣及孤奉命爲巡撫孤責愈重母憂
慮愈深凡處民夷馭官兵一勸以寬大爲尚會古
田府江懷遠洛容諸蠻弗靖連歲用兵母時時誡

之曰兵興旣非得已但得渠惡以伸天誅足矣母
容妄殺傷天和我且卧不帖席矣孤日益惴惴用
安母心有司故事五日一供柴燭果核之屬母命
去其大半飭諸家人曰皆民膏脂也雖一燭一果
無有敢妄費者萬曆改元覃

恩祖父俱加贈通議大夫都察院右副都御史祖母
吳加贈淑人母卓加封太淑人甲戌九月爲母八
十誕晨粵中同事諸縉紳率操文幣庭賀母怫然
久之曰我一女流至枉重諸貴人我心不寧甚矣

况我之憂有不可解者乎果桃茹麪之類皆傷名
檢定母入官下物孤以母意悉辭謝諸餽居粵歲
多時有故園之想然惟恐孤以此故懈視事心則
又時時勉以大義勿令作兒女子態孤嘗兩上章
乞侍養䟽發越月母偶知之愠曰我尚無恙不一
心報國欲促我亡耶至減常食之半及聞䟽不果
上意乃少釋孤又值

覃恩私痛母孀節時年與令甲合今業隄八耄因
例改封誥擬併陳母大節撫育兒孤苦狀母輒泣不

食哽咽曰嗟乎悲夫此吾不幸也兒不幸也兒忠
爲臣分吾節爲婦分臣不爲忠將爲不忠乎婦節
亦猶是矣况而父歿而血食于茲正吾兒風木慟
心之地吾卽孱婦人時爲兒不忍歿而殉而父忍
今以而父殉名耶父爲忠兒爲孝吾爲節等分耳
是在各自盡兒疏必上吾不食從而父地下矣孤
懼飲泣不敢復啓喙其引分矢節以大義責孤又
類此乙亥秋聞報

召入母喜動顏色孤將謂得遂首丘之願幸也母逆

知孤意一還里門無獨往赴官理及就道母輒謂
曰

天子召汝還朝汝可不赴

闕謝恩而動爲家鄉念豈遽料我有他故耶徒使我
敝精神勞往返耳家人亦力請過家之使母乃大
怒曰汝主聽自還鄉母逼我爲也孤重違母意不
獲已由信州而止擬詣

闕之後陳情乞歸不且請圖徙南曹便菽水亦母意
也不謂至楊州母卒感疾猶自謂無慮強令前發

二月廿一日至淮安覺稍瘥問曰何至今未解舟
我已夢至張家灣必欲我南歸不三日死矣詎病
寢以劇遽以念六日身逝嗚呼痛哉嗚呼痛哉孤
不孝之罪即殞首裂心不足贖矣尚何忍言哉孤
扶櫬泣血歸次武林廼籲疏請曰臣母卓孀居五
十餘年臣乳乳孤幼賴母鞠育訓誨迄于今日比
照

典例品級軍功應得祭葬又臣父湍通判邊郡歿身
勤事並祭合葬亦與例合疏上荷蒙

天恩特允頒給太淑人卹典先大人均霑隆渥蓋爲異數孤不勝哀痛感泣欲紀

主恩親德而無由也兄應科菴矣命孤述母行實懇祈名作勒石以垂永久惟執事先生垂察焉母生於弘治乙卯九月二十四日午時卒於萬曆丙子二月二十六日戌時享年八十有二子三長應科七品散官娶黃氏次應徵靖藩典儀正先卒娶知府張公洽孫女皆前母黃淑人出次即孤應聘戶部右侍郎母出進士都事余公康孫女封安人累

贈淑人繼長史楊公日宗孫女封淑人女二長適
陳知州憲黃出次適同知黃公仕達子一夔母出
孫男七文光娶余公康曾孫女文寵娶御史林公
誠曾孫女文衡郡庠生娶葉氏文采郡庠生娶宋
氏良翰聘南京工部尚書康公大和女良棟聘叅
政鄭公茂女俱官生文明聘御史史公梧孫女曾
孫八玄孫七墓在壺公之大龍山坐辛向乙凡六
窀穸左之中已葬先都憲凝波府君左之左葬黃淑
人左之又左今葬母太淑人右之中右之右右之

又右葬先叔父戶部主事南窓府君暨先叔母封
安人吳氏側室林氏祔云

碑

重脩遮浪海隄碑

隄海而田利最鉅然善崩害亦鉅興廢在人君子
於是考政焉遮浪海隄袤千有餘丈始築於郡守
黃公一道再築於郡守易公道談暨泉郡貳守譚
公維鼎時夷難孔棘費水衡錢三千緡乃邑人侍
御林君潤所請者其詳載郡志中迺今又就圯不

身集卷之二十一
二
三
佞某家距隄不數里稔聞厥狀亦嘗竊抱杞憂會
御史中丞龐公尚鵬自南海起撫吾閩銳志求瘼
而郡守陸公通霄甫下車即問民疾苦不佞間以
其事告于公公惻然亟欲爲民造命既而耆民程
愚美等控于撫臺臺下之郡陸公遂偕節推馬公
伯瞻躬往相度之議所以治隄法甚備命主簿韓
槐覈其數隄之圯者一百四十六丈有奇費當以
千計而官藏董羨郵金四百則議令隄田二萬畝
各輸金有差積微成鉅可得金六百以足前數民

無不踴躍爭先者乃削牘條上龐公與按院侍御
商公爲正大題之今撫臺中丞劉公思問繼至復
申飭有加而大叅王公元敬李公臺憲副喬公懋
敬姚公體信咸以職事報可廼檄別駕許公培之
董其事許公乃朝夕廬隄上携糗糒自隨不以供
億煩民布椿疊石縱橫間豎修其圯者如前數又
並葺其稍圯者通爲丈四百二十有奇隄之外故
有磯四今則起其陷者爲之增庠繕薄而復創築
其一隄之崇故爲尺者六今益其二而實土于內

上下加高廣匠石徒庸皆官給之直踐更而作無
敢有墮嬾者費于昔而功則倍之經始於仲夏落
成於孟秋蓋爲今

皇帝戊寅之歲云是役也兩臺主于上而龐公寔肇
其端藩臬諸大夫贊于中而王喬二公以分土又
屢省焉乃若宣勞于下則陸公總厥成馬公經厥
始許公虔厥終而郡丞朱公繼文邑侯葉公承遇
亦先後協佐與簿之胼胝皆足多云余嘗讀河渠
書每嘆以汲鄭之才不能終塞瓠子而宣房之役

至今從官負薪天子沉璧何孔瘁哉是無他先事
者易爲力既廢者難爲功也夫防河與隄海一也
假令茲役盈庭靡決嵒窳即安俟大弊極壞而後
圖焉即無論所費鉅萬其如閭殍爲河何乃今崇
隄砥平沃壤鱗次田畯喜而婦子寧諸大夫之功
且將垂之百禩矣適縉紳士民麋來請記不佞樂
觀厥成况首議嘗贊辭焉藉有名碩得不墜于空
談是宜登諸石以詔來者

郭襄靖公遺集卷之二十終